

Tiga siswazah jual sayur bantu petani

Lepasan universiti hanya ambil untung purata jualan bawah 50 sen sekilogram

Kuantan: Membantu pekebun memasarkan hasil pertanian, sekali gus membolehkan masyarakat mendapatkan sayur segar pada harga murah, menjadi pegangan tiga siswazah universiti ini ketika mula berjinak-jinak dalam bidang pertanian pada awal tahun lalu.

Untuk itu, Muhammad Naqib Azam, 31, bersama dua rakan sebayanya Mohd Syamim Aizat Zaki dan Muhammad Zaid Zuhri, bersetuju supaya keuntungan purata sayur-sayuran jualan mereka ditetapkan di bawah 50 sen sekilogram.

Sebagai contoh, Muhammad Naqib, berkata timun yang dibeli daripada pekebun pada harga RM2.70 sekilogram dijual pada harga RM3 sekilogram iaitu lebih murah berbanding RM3.50 yang ditetapkan pada skim kawalan harga.

"Kami menjual pada harga begitu kerana tidak perlu melalui pelbagai lapisan memandangkan semuanya dilakukan sendiri daripada mencari pekebun, membawa hasil ke pusat pengumpulan untuk dibungkus sehingga menghantar kepada pembeli.

"Hubungan baik dengan pekebun juga membolehkan kami mendapatkan harga sedikit murah, selain niat mahu membantu mereka supaya semua hasil kebun dapat dipasarkan tanpa banyak kerehah," kata pemegang Ijazah Sarjana Muda Sains Terapan, Universiti Putra Malaysia (UPM) itu, semalam.

Beliau berkata demikian ketika ditemui di Taman Kekal Pengeluaran Makanan Projek Fertiqasi Inderapura, di sini, yang

menjadi 'pejabat' mereka.

Anak jati Raub itu berkata, bagi memastikan harga jualan dapat dikekalkan pada harga murah, mereka juga sepakat tidak mengambil kos pengangkutan secara berlebihan, malah pernah menyerap kos itu apabila harga sayur sedikit meningkat.

Selain timun, Muhammad Naqib, berkata sayuran lain yang dijual seperti lada, bendi dan kacang panjang, bergantung hasil yang boleh diperolehi dari kebun di sekitar Kuantan dan Pekan pada hari berkenaan.

Mengimbas pembabitan mereka dalam industri pertanian, Mohd Syamim, berkata ia bermula ketika pelaksanaan Perintah Kawalan Pergerakan (PKP) apabila melihat ada pekebun tidak dapat memasarkan produk mereka disebabkan banyak kedai makan ditutup.

"Untuk membantu petani, kami menawarkan diri menjual hasil kebun mereka pada harga murah supaya sekurang-kurangnya mereka boleh dapat pula-



Mohd Syamim menunjukkan bekalan timun sebelum dijual kepada pelanggan ketika ditemui di Taman Kekal Pengeluaran Makanan Projek Fertiqasi Inderapura, dekat Kuantan.

(Foto BERNAMA)

ngan modal. Disebabkan tiada platform khusus, kami bermula dengan menjual kepada ahli keluarga, jiran dan penduduk taman perumahan.

"Iklan menerusi mulut ke mulut membantu orang ramai mengenali kami selain turut dipromosikan di media sosial, termasuk di akaun Facebook 'Dari Kebun' supaya lebih mudah orang ramai menghubungi kami.

"Tanpa diduga kami semakin berminat dalam perniagaan sa-

yur ini, lalu menubuhkan syarikat SZ Sayur Trading bagi melancarkan lagi operasi," katanya.

Sejak bergelar 'saudagar sayur' Mohd Syamim, lulusan Ijazah Sarjana Muda Kimia Industri **Universiti Malaysia Pahang (UMP)**, berkata rutin harian mereka bermula seawal 9 pagi dengan mengambil sayur di kebun dan dibawa ke pejabat untuk penggredan serta pembungkusan. BERNAMA